



Sakspapir

Sakshandsamar	Arkiv	ArkivsakID
Dagrun Gunnarson	FE-614, FA-C10	21/371

Saksnr	Utval	Type	Dato
072/21	Formannskapet	PS	07.09.2021
057/21	Kommunestyret	PS	16.09.2021

"Ein plass å vere" - lokale for ungdomsklubb Arbeidsgruppe kommunestyret for ungdomsklubb

Saksutgreiing:

Kva gjeld saka? Kommunestyret vurderer å flytte kulturskulen til skulens lokale, for å ha ein plass til ungdomsklubb/ein plass for ungdommen å vere.

Saksopplysningar

Bakgrunn:

Ungdomsrådet har ønske om å få ein plass å vere for ungdommen som ungdommen kan styre sjølv. I dag er det ungdomskafe tysdagar 1830-2100 i Hjartebankjen for ungdomsskuletrinna. Vidaregåande elevar er og velkomne, men dei sluttar gjerne å kome etter fylte 17-18 år. Sist skuleår varierte oppmøtet frå 3-12 ungdommar, på det jamne 7-8 ungdommar.

Elles er tilbod for ungdom knytt til konkrete aktivitetar som fotball/svømming/div trening, Dungeons&Dragons, korps/kulturskule, rockeklubb, ungdomsarrangement på biblioteket og arrangement som ungdomsrådet arrangerer. Pga. Covid-19 har ungdomsrådet ikkje kunne hatt arrangement sidan 2019.

På ungdomsskulen er det dette skuleåret 18 elevar. Det er svært få ungdommar som bur på Fedje og går på Austrheim Vidaregåande skule dette skuleåret. I tillegg kjem ungdommar på andre vidaregåande skular, som kan kome heim i helger og feriar.

Politisk tinging.

Kommunestyret ønskjer å legge til rette for ønsket frå ungdomsrådet om ein plass å vere. Det vart nedsett ei arbeidsgruppe for ungdomsklubb. Kommunestyret vedtok seinare at dei ønskte ei saksutgreiing til septembermøtet 2021 om å gje kulturskulen sine lokale til ungdomsklubb.



Fedje kommune

Historikk

18.02.21: Kommunestyret sette ned ei arbeidsgruppe som skal jobbe med lokalitet for ungdomsklubb, med Thea Koppen Blomvågnes som leiar. Eg har ikkje oversikt over andre medlemmar i gruppa, og gruppa har så vidt eg veit ikkje fått spesifisert nærare noko mandat eller budsjett. Det avviker noko frå dei andre arbeidsgruppene kommunestyret sett ned.

18.03.21: Ungdomsrådet utnemnde to av sine medlemmar til arbeidsgruppa.

11.05.21: Arbeidsgruppa hadde møte med teknisk etat, og fekk tilbod om å bruke foajeen til Fedje fleirbrukshall (etter avtale med styret. Arbeidsgruppa ønskte ikkje dette lokalet.

25.05.21: Leiar fellestenester sendte ut forslag om å flytte kulturskulen til skulens lokale på «minihøyning» til teknisk sjef og rektor. Fekk svar innan 03.06.21. Ikkje mogleg å spørje kulturskulerektor, sidan han hadde permisjon til 01.08.21

Veke 24 -2021: Leiar fellestenester informerte rådmann og arbeidsgruppeleiar om status i saka. Det er ikkje er riktig å flytte kulturskulen utan først å ha snakka med kulturskulerektor, som enno ikkje er tilbake frå permisjon.

17.06.21: Kommunestyret ber under eventuelt om å få saka til behandling i september.

I samtale med arbeidsgruppa si leiar 17.08.21 og kommunen sitt møte med arbeidsgruppa 11.05.21, kom det fram følgjande:

- Ungdommen ønskjer ein plass å vere, som dei kan utforme sjølve med maling/møblering, i eit lokale dei ikkje treng å vere redd for. Ein plass dei har tilknytning til.
- Dei skal ha med foreldre på dugnad til oppussing.
- Dei ønskjer små rom heller enn eit stort, sidan dei er ei lita gruppe.
- Dei treng tilgang til toalett, og ønskjer seg tilgang kjøkken.
- Dei ønskjer eit lokale det ikkje er så farleg med, der dei ikkje får kritikk for ting som vert øydelagte/endra på el.l.
- Arbeidsgruppa har ikkje budsjett eller økonomiske rammer. Det er difor ikkje avklart kor evt. pengar til oppussing/ending skal kome frå.
- Arbeidsgruppa har ikkje nokon plan for driftsform pr. i dag. Dei ser kanskje for seg at det er ein eller fleire ungdom over 18 år som tar ansvaret på dugnad.
- Målgruppa er ungdom på ungdomsskulen og vidaregåande skule. Viktig mål er å inkludere og gje tilbod til ungdom som går på vidaregåande skule, også andre plassar enn Austrheim vgs.

Vurdering

Alternativ så langt



Fedje kommune

1. *Fedje fleirbrukshall/foaje*

Arbeidsgruppa fekk i møte 11.05.21 tilbod om å nytte foajeen til stad å vere/ungdomsklubb. Tilbodet er klarert med styreleiar i fleirbrukshallen. Dette ønskte ikkje arbeidsgruppa.

Fordelar:

Kan starte opp umiddelbart, er ferdig møblert.

Tilgang toalett/kjøkken.

Får meir aktivitet inn i fleirbrukshallen

Ulemper:

Opningstid må verte tilpassa andre aktivitetar

Ungdommane opplever at dette er eit bygg der deira aktivitet medfører sanksjonar og kritikk, at dette ikkje er «deira» lokale.

Rommet er for stort/ungdomsgruppa er liten

Vurdering:

Dette er ei lokalisering der ein kan kome umiddelbart i gong med aktivitetar. Om ein kjem raskt i gong, vil det kanskje lettare vise seg kva det er behov for/ønskje om, korleis ein kan organisere drifta mm.

2. *Kulturskulen sine lokale i den raude brakka*

Arbeidsgruppa kom i 11.05.21 med forslag om å overta kulturskulen sine lokale i kulturbrakka og flytte kulturskulen til skulen sine lokale.

Fordelar:

Fleire mindre rom

Dårleg bygg i utgangspunktet, vert ikkje verre av dugnadsoppussing



Fedje kommune

Tilgang på toalett (men treng utskifting av toalett)

Skulen kan tilby musikkrom og siderom/lite lager til kulturskulen utanom skuletid.

Ulemper:

Kulturskulerektor meiner flytting til skulen vil vere svært negativt for kulturskulen. Tidlegare var kulturskulen i skulelokala, og det vart flytta derifrå av tre grunnar:

a. Kulturskulen har mykje dyre instrument og utstyr. Skulen vår er ein open skule, der instrument erfaringsmessig vert øydelagt fordi dei mesteparten av tida står utan tilsyn.

b. Kulturskulen sine behov vil alltid måtte vike for skulen sine skiftande behov.

c. Me har berre 40% stilling i kulturskulen. Å ha kontor anna plass enn undervisning, slik det vert nødvendig med denne løysinga, kan gjere at tida vert brukt mindre effektivt.

Denne delen av kulturbrakka har ikkje kjøkken.

Vurdering:

Rådmannen meiner dette er ei dårleg løysing, basert på kulturskulerektor sine innspel. Me kjem til å få tilbake dei problemstillingane me løyste ved å flytte kulturskulen frå skulen til kulturbrakka. Sidan kulturskulen er eit lovpålagt tilbod, må deira behov kome foran ikkje-lovpålagte tilbod.

Mangel på kjøkken: Det har vore lufta om ein kan opne opp mellom dei to delane i kulturbrakka, slik at ungdomsklubben får tilgang til kjøkken. Skiljet mellom dei to avdelingane i brakka vart sett inn for å unngå problem med sanksjonar/kritikk for aktiviteten i fritidsklubben, utstyr som vart øydelagt osv. Rockeklubben har også mykje dyrt utstyr. Rådmannen vurderer difor opning mellom dei to delane som ein dårleg ide, men det er mogleg å sjå for seg å flytte veggen slik at kjøkkenet høyrer til kulturskuledelen i staden for til rockeklubb delen. Spørsmålet vert i så fall kven som skal gjere det og økonomisk ramme for eit slikt tiltak.

3. Rockeklubben sine lokale i den raude brakka

Dette alternativet har ikkje vore inne i drøftinga så langt, så vidt rådmannen veit. Forslaget er basert på ønsket om å vere i kulturbrakka. Saka er ikkje drøfta med styret i rockeklubben, noko som vil vere naturleg om kommunestyret ønskjer at me går vidare på denne vegen.



Fedje kommune

Fordelar:

Har kjøkken og toalett

Har to rom, eit stort og eit mindre

Ikkje tapte leigeinntekter og ikkje lovpålagt tilbod

Ulemper:

Rockeklubben er også eit ungdomstilbod, sjølv om ingen ungdommar nyttar det no

Rockeklubben er eit aktivt miljø med fleire band som er viktige på kulturscenen på Fedje, og gjer ein viktig dugnadsjobb i forhold til lyd/lys på andre kommunale og private arrangement

Vurdering:

Lokalet har vore nytta til fritidsklubb tidlegare, og er difor egna. Rådmannen ønskjer ikkje å kaste ut rockeklubben. Men om valet står mellom kulturskule eller rockeklubb, meiner rådmannen at det lovpålagte tilbodet må få forrang. Om kommunestyret vel denne løysinga, er det viktig at rockeklubben i så fall får uttale seg og at prosessen vert forsvarleg.

4. Andre alternative lokale

Eit mogleg lokale som arbeidsgruppa ikkje har vurdert nærare, er underetasjen på «Posten». Her har det tidlegare vore vaksenopplæring, men det er ikkje tilbod om det neste skuleår. Feddie Distillery har opsjon på å kjøpe huset, men det er ikkje solgt pr i dag. Men dette kan vere berre ei mellombels løysing.

Det kan vere mogleg for arbeidsgruppa å gå breiare ut og vurdere andre lokale. Me har t.d. to ungdomshus på Fedje med lite aktivitet – kan det vere moglegheiter der for eit frivillig organisert initiativ frå ungdommane og foreldra?

Økonomi:

Det er ikkje sett av midlar til utstyr til oppussing av noko lokale, men det er planlagt dugnadsarbeid. Kommunestyret må i så setja av midlar til oppussingmateriale/innkjøp. Sjå elles kommentarar om



Fedje kommune

driftsform.

Driftsform

Det er ikkje avklart i arbeidsgruppa kva for driftsform dei tenker seg for lokalet/ungdomsklubben., utanom at dei har ein ide om å få til dugnad frå ungdom over 18 år.

Rådmannen meiner at når ungdommane får tilgang til eit kommunalt lokale bør det også sikrast tilsyn frå nokon over 18 år som er ansvarlege for lokalet og for at det ikkje skjer noko ulovleg der, som røyking, drikking el.l. Pr i dag er det ikkje sett av midlar på budsjettet til slikt tilsyn, utanom det me allereie nyttar i Hjartebankjen på tysdagskveldar.

Det vil jo og vere mogleg med ein dugnadsturnus for foreldra. Spørsmålet er om det er dette ungdommane er ute etter, eller om det liknar for mykje på tilbodet på tysdagar i Hjartebankjen.

Rådmannen rår derfor til at arbeidsgruppa i første omgang startar opp eit tilbod i foajeen i Fedje fleirbrukshall, og nyttar t.d. 4-6 månader til å finne ut nærare kva ungdommen ønskjer, kva behova er og korleis driftsforma kan vere. Ein kan då halde fram med å sjå på lokale, og få inkorporert evt. økonomiske behov i budsjett for 2022.

Konklusjon

Kommunen har lovpålagte oppgåver, og andre oppgåver/tilbod som kommunestyret ønskjer i tillegg. Om ulike interesser kjem i konflikt, meiner rådmannen det er viktig at kommunestyret er tydeleg på kva som er lovpålagt og prioriterer det. Kulturskule er eit slikt lovpålagt tilbod (opplæringslova § 13-6).

Samstundes er det ikkje ideelt å la eit tilbod som også er retta mot ungdom (rockeklubb) vike for oppstart av eit anna tilbod (ungdomsklubb). Rådmannen rår derfor til at ein nyttar Fedje fleirbrukshall sin foaje for rask oppstart, medan arbeidsgruppa ser vidare på alternative lokale og driftsformar.

Forslag til vedtak:

Fedje kommune ber arbeidsgruppa for ungdomsklubb om å arbeide vidare med driftsform og lokale for ungdomsklubb. I mellomtida kan ein inngå avtale med styret om bruk av foajeen i Fedje



Fedje kommune

fleirbrukshall.

Formannskapet - 072/21

F - behandling:

Felles endringsframlegg, foreslått av Stian Herøy, Høgre

Formannskapet ber administrasjonen ha dialog med rockeklubben og kulturskulen om det er mogleg med eit sambruk av rockeklubbens lokale. Om dette er noko ein kan verte samde om, vil formannskapet ha saka til orientering før den går til kommunestyret. Om ikkje, vil me ha saka opp i neste formannskap og påfølgjende kommunestyre.

F - vedtak:

Formannskapet ber administrasjonen ha dialog med rockeklubben og kulturskulen om det er mogleg med eit sambruk av rockeklubbens lokale. Om dette er noko ein kan verte samde om, vil formannskapet ha saka til orientering før den går til kommunestyret. Om ikkje, vil me ha saka opp i neste formannskap og påfølgjande kommunestyre.

Samrøystes vedteke.

Kommunestyret - 057/21

K - behandling:

Ein plass å vere, foreslått av Silje Sulen Gullaksen, Høgre

Høgre foreslår å ta i bruk første etasjen i det gamle post lokalet.

Tilleggsframlegg til H sitt forslag, foreslått av Kamilla Bjerkholt Karlsen, Arbeiderpartiet

Ordførar går i dialog med Feddie for å få eit tidsperspektiv på kor lenge Fedje kommune kan nytte lokalet som ungdomsklubb.

Ordførar orienterte om at det i formannskapet hadde vore drøfta om 1 etg. i posten kan brukast som ungdomsklubb. Feddie Distillery AS har opsjon på kjøp av huset i Stormarksvegen 7. Ordførar melder om at Feddie Destillery AS har ingen kortidsplaner for å løysa inn opsjon knytt til Stormarksvegen 7. Forslag frå Otto Andre Nordby (H) Høgre foreslår å ta i bruk første etasjen i det gamle post lokalet. Forslag frå Kamilla B K Karlsen (Ap) Ordførar går i dialog med Feddie for å få eit tidsperspektiv på kor lenge Fedje kommune kan nytte lokalet som ungdomsklubb. Forslaga vart handsama subsidiert.

K - vedtak:



Fedje kommune

Kommunestyret røysta først over formannskapet sitt vedtak. Eit samrøyster kommunestyre røysta i mot formannskapet sitt vedtak.

Forslag frå Otto Andre Nordby (H) Høgre foreslår å ta i bruk første etasjen i det gamle post lokalet.

Samrøystes vedteke.

Forslag frå Kamilla B K Karlsen (Ap) Ordførar går i dialog med Feddie for å få eit tidsperspektiv på kor lenge Fedje kommune kan nytte lokalet som ungdomsklubb.

Forslaget frå Kamilla B K Karlsen fekk 6 røyster Ap, Høgre og Frp røysta mot forslaget. Forslaget fall 6 (Ap) mot 9 røyster (H/Frp)